

## David Geisser – gardist papal e cuschinier reputau

f | ✉ | 📞 | 📌 [Beitrag in Merkliste speichern](#)

(anr) David Geisser, derivonts dalla Surselva turitgesa, ei buca mo gardist papal, mobein era in enconuschent cuschinier. El ei autur da divers cudischs da receipts.

Il novissim ei «Buon appetito – Rezepte, Geschichten und prominente Portraits». En quel presenta el ils receipts per spisas preferidas dil papa, da cardinals e dils gardists.

Che ei gardist papal ei buca da sesmarvigliar. Gia siu bab ei staus quei. Lez era in dils emprems che han gidau a neutralisar Ali Agca, che veva fatg ils 13 da matg 1981 in attentat sin papa Gion Paul II. Oz presta David survetsch al papa – ensemen cun siu frar

Sin la damonda, daco ch'in giuven cun ton success seretraigi el Vatican, ha David Geisser manegiau ch'ei detti biaras raschuns persuerter. El seigi fascinaus dil papa, dallas grondas personalitads che vegnan dil e van el Vatican, sco era dalla baselgia e dil marcau da Roma. Saver realisar siu siemi seigi per el personalmein pli impurtont che ver success economic. Essend che ses emprems cudischs da cuschinar hagian giu fetg gronda resonanza seigi el schizun vegnius envidaus en da en sia emissiuon televisiva. Quei veva giu impressiuonau il cumandant dalla garda papala aschi fetg che lez hagi dumandau sch'el savessi s'imaginar da realisar in cudisch da cuschinar en connex cun la Garda.

David Geisser ei ius alla tscherca da receipts e cattau sias fontaunas sur officiers, sur cardinals tochen tier il papa. Sur il secretari ha il papa palesau tgeinin che seigi siu dessert preferiu, numnadamein: «Dulce de leche». En l'Argentina seigi quei dessert fetg derasaus. Ell'Europa stoppien ins aunc pér s'endisar vidlunder. Era per David Geisser ei quella bubronda dultscha staus il pli sorprendent dessert ch'el ha priu si en siu cudisch. Ei drovi leutier 1,5 kg zucher e 2,5 l latg – ina vera bumba da zucher e calorias. Insumma hagi el cuschinau suenter tuts receipts tochen ch'el eri perschuadius dalla quantidad, ingredienzas e preparaziun. E lu hagian ses camerats dalla Garda gudiu quei. Sper ils receipts cattan ins en quei cudisch era historias e purtrets da personalitads specialas.

Il cudisch da cuschinar da David Geisser per las spisas preferidas el Vatican ei staus ina sorpresa. La casa editura veva aunc mai fatg ina tala experientscha e spert realisau che quei cudisch hagi aspects da daventar in bestseller. Suenter la presentaziun hagi ei dau bia reacziuns, damondas e grond interess digl entir mund. Aschia seigi la schanza gronda che quei cudisch da receipts, screts en tudestg, vegni aunc a cumparer uonn per engles, spagnol, franzos e talian.

David Geisser ei in um da grond potenzial e fetg creativs. Ins vegni aunc ad udir dad el. Dapresent presta el ils dus onns survetsch ella Garda papala. Schebein el stetti pli ditg, sappi el aunc buca. Era sch'el seigi cuschinier ed autur cun success batti siu cor per la Garda papala svizra.